

Date – 05/09/2025

Time - 07:30 Hrs

HEADLINES (MORNING)

1. School Education Minister Dr Vanlalhlalan zirtirtute chu ruihhlo laka fihlim turin a chah.
2. Mizorama rel lo lut tur puala inbuatsaih na chi khat atan, sorkar chuan Kolasib-ah ILP pek chhuah dan chungchang Training buatsaih a ni.
3. Sorkar laipuiin Goods and Services Tax (GST) rate tihhniam a rel chuan Mizoramah lawm a hlawh hle.
4. Prime Minister Narendra MODia chuan GST 2.0 chu ram hmasawwna leh sawrkar puihna kalkawp anih thu a sawi.

<><><>

TEACHERS DAY MESSAGE

School Education Minister Dr Vanlalhlalan zirtirtute chu ruihhlo laka fihlim turin a chah. Akashvani Aizawl kaltlanga Zirtirtute Ni puala a thuchahah Dr Vanlalhlalan chuan Zirtirtu hna chu hna thianghlim a ni a ti a, zirlaite mai bakah mipui vantlang tan pawha entwawn tlak leh mi rinawm ni turin a ngen tih a sawi a ni.

Dr Vanlalhlalan chuan Mizoram sorkar in zirna tihhmasawn nan theihtawp a chhuah chho mek a, 2024-25 chhung khan sikul 68 leh office building sak that leh thuam that a ni a ti a, Disaster Mangement & Rehabilitation Dept puihna in sikul 434 leh subordinate office thuam that nan, Cyclone Remal Daamages Relief Fund vbc 3 chuang hmanral a ni bawk a ti a ni.

Dr Vanlalhlalan chuan Zirtirtu indaihlohna phuhruk turin theihtawp an chhuah a ti a, an sorkar atangin, school education dept chuan casual teacher primary school 648, middle school 371, high school zirtirtu 350 leh Hr Sec School Lecturer 50 lak a ni tawh a ti a, primary school casual teacher 234 lakbelhna tur pawh buaipui mek a ni, a ti.

Zirtirtu natna khirkhan tuarte tanpuina tur National Foundation for Teachers Welfare fund a zirtirtute sum thawhkhawm atangin nikum sept thla atanga – kumin august thla thleng khan zirtirtu 153 hnenah cheng nuai 25 sing 6 tanpuina pekchhuah a ni a ti.

Dr Vanlalhlalan chuan kuminah National award dawng tur zirtirtu an awm lo tih sawiin, pawl a tih thu a sawi a, Mizoram sorkarin a mi 3 a rawt chungin kuminah dawng thei an awm lo a ti a, hei hi a chhan chu documentation uar tawh loh vang a ni a ti a, evidence, document leh thlalak thlenga vawn that anih thin loh avangin zirtirtu ten an phu tawh chawimawina an hmuh loh phah thin a, hemi kawngah hian tan lak thar a pawimawh ati.

MAUBAWK MURDER CASE

Aizawl Maubawk veng Pi Rûnlani kum 80 mi thattua puh Vanlalmuanchhana kum 21 chu nimin khan court-ah hruai a ni a; Maubawk veng tlawmngai pawl hrang hrangte chu court tualah pungkhawmin, tualthattu chu a phu tawh hremna pek ngei an phut thu an tarlang.

Maubawk veng NGO hrang hrangte hian tualthattu an demna thuziak hrang hrang an keng a; tualthattu chu a phû tâwk hremna pe ngei turin court an ngen tih Maubawk Branch MHIP President Pi Zodinmawin a sawi.

Puan tawh angin, Pi Runlani hi a fanu leh a tupa nena khawsa an ni a, an in chhungah eichawp dawr an nei a. Thla hlui ni 19 khan an dawra thil lei tur pakhat in chhun dar 12:30 velah thiin a hmu a, a hrawkah chema zaina hnûhma a awm a ni.

<><><>

ILP TRAINING

Mizorama rel lo lut tur puala inbuatsaih na chi khat atan, sorkar chuan Kolasib DC Conference Hall-ah Inner Line Permit (ILP) pek chhuah dan chungchangah Training nimin khan a buatsaih a. He hun hi Home Department Addl. Secretary Dr. Andrew H. Vanlaldikan a kaihruai a ni.

Dr. Andrew H. Vanlaldika chuan Mizoram in hmasawnna rahbi thar kai in, State luhka a hawn zauh rual hian ram chhung mipuite chanvo humhim a pawimawh a ni, a ti a. September ni 13 a Mizoram chhunga Rail Station hawn belh turah pawh Mizoram sorkar leh Home Department chuan dan lova State dang atang rawn lutte ven kawngah theih tawp chhuah an tum a ti a. Mizoram chhunga cheng mipuite dikna chanvo humhalh hna chu ram chhung mipuite kutah a awm thu sawiin , sorkar in ram hmakhua ngai a, dan leh inkaihhraina a siam te chu zawm tlat a pawimawh thu a sawi bawk.

He hunah hian Kolasib DC Pu Robert C. Lalhmangaiha pawhin thu sawi in, Kolasib District chhunga ILP Check Gate dinhmunte a tarlang a, Vairengte leh Bairabi Sub-Division chhungah District Administration Office hmalakna in ILP Check Gate pakhat ve ve a awm thu te, Saihapui 'V' leh Phaisen a Police Duty Post-ah ILP enfiah hnathawh a nih thu a sawi a. Heng ILP Check-na hmunah te hian fimkhur takin State pawn atanga rawn lut tur te lehkha pawimawh (Document) te enfiah thin anih thu a sawi bawk.

Mizoramah September ni 13 hian Sairang ah Rail Station thar hawn belh ani dawn a, Rail Service hi Sihhmui thleng in a kal dawn a. Hemi avang hian Mizoram chhunga Rail Station hmun 5- Sihhmui, Mualkhang, Kawnpui, Hortoki leh Bairabi ah te Inner Line Permit (ILP) uluk zawk a pehchhuah tul a tih thu sawiin, Mizoram sorkar chuan hei hi a ngai pawimawh hle ani, a ti.

Kolasib DC Conference Hall-a ILP pekchhuah kawnga Training ah hian ILP Guidelines-te, hmalak ngai leh hriat tur pawimawh te sawiho in, zawhna leh chhanna hun hman a ni bawk. He hunah hian Rail Station a Police Duty turte leh Kolasib DC Office a thawktu pawimawh te an tel a ni.

<><><>

NH 306& 06

Deputy Speaker, Pu Lalfamkima Kolasib tan tlang Mizoram chak lakluhna kawngpui siam chungchangah chhuanlam siam chuan tawp hun a nei dawn lova, chuang chuan a taka hmuh theih a thawh a ngai tawh, a ti.

Kolasib District tan tlang National Highway 306 & 06 a Kawngpui thawmthat hna kal mek chu chak zawka kalpui a nih theih nan Deputy Speaker, Pu Lalfamkima hovin Kolasib DC Conference Hall ah nimin khan meeting neih a ni a.

Deputy Speaker Pu Lalfamkima chuan NHIDCL aiawh kalkhawmte hnenah chuan hun rei tawh tak atanga kawngpui that hleih theih loh avanga mipuite tawrhna te sawiin kawngpui tha neih theih nan theihtawp an chhuah a tul takzet tawh a ni, a ti a. Ram leilung dinhmun pawh hman atanga hriat tawh a ni a, tuna chhuanlam atana siam a ni leh thin chu a pawl a tih thu a sawi a ni.

Deputy Speaker chuan Kolasib District hmun hrang hrangah kawngpui motor tan a zawh tlak loh khawp in a awm a, heng siam nan hian hun an pawhsei zel chuan working season chhungin hnathawk hman lovin an awm leh dawn a, chuang chuan a theih anga a tul ang ang te bawhzui rang turin NHIDCL aiawhte chu a hriattir a. NHIDCL thawktute telin a hma thei ang ber a ama hova kawng en a thawh chhuah ni se a ti bawk.

He thutkhawmna ah hian NHIDCL atangin Pu BK Srivastava, General Manager, NHIDCL chuan National Highway 306 & 06 kawngpui thawmthat hna kal mek ah kawng dinhmun a that theih lohna chhan te tarlangin chung zingah chuan lei chhung atanga tui lo put te, motor overload a tlan thin te, kawng siam tirh a lung chang tha nilo leh material tha tawk lo hman te leh chhan hrang hrang avanga kawngpuia tui tlingte an ni ber a ni, a ti a. Hemi chungchang enfiah turin leh a chhiat zualna zirchiang turin CRRI team an lokal anga chumi te zirchianna report pek a zirin an hmunpui lam atangin kawng siam zelna tur sum pawh an rawn pe chhuak dawn a ni, a ti. Kawngpui thawmthat hna contractor 5 ina an kalpui mek erawh a kal chhunzawm zel anga, a chhe zual lai zirchianna chu CRRI survey ina a huam tur a nih thu a sawi bawk.

He hunah hian NH 306&06 thawmthat mek chungchang bakah EPC contractor ten 4 lane kawngpui an laih mek te leh NHIDCL leh State Sawrkar Department thenkhat inkara sawi tlan ngai te sawihona neih a ni bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

GST HAILED

Sorkarin Goods and Services Tax (GST) rate tihhniam a rel chuan Mizoramah lawm a hlawh hle a, Kan corr in mi hrang hrang a kawmnaah thilman, a bikin nitin ei leh in te leh damdawi lam man tlawm tur chu lawmawm an tih thu an sawi a ni. Govt Aizawl College, Commerce Dept-a Asst Professor Dr. Vanlalmuana chuan GST rate tihhniam anih hunah chuan mipuiin bungrua an lei chak tawh anga, GST rate hniam avanga sorkar pawisa hloh tur chhanhim beisei a ni a ti. Dr. Vanlalmuana chuan GST rate thar hian Mizoramah nghawng a nei nghal dawn tih sawiin, nitin mamawh ei leh in man a tlawm bakah, sumdawngte tan pawh chhiah pek a awlsam sawt dawn bawk a ni a ti. Kan corr in bazar-a thilleitu nu pakhat a kawm chuan, a chanchinthar hriat chu lawmawm a tih thu leh mi ten a an lawm em em tur ni a a hriat thu a sawi a ni.

<><><>

GST

Industry hotute chuan GST siam thar chuan sumdawnna a tih awlsam dawn avangin an lawm hle tih an sawi. Akashvani in a bik taka a kawmnaah Confederation of Indian Textile Industry Secretary General, Chandrima Chatterjee Indian Textile Industry chu an lawm hle tih sawiin GST rate tih danglam chu an lawm hle a ti a. Industry ah nghawng tha tak a chhuah ngei ang a ti bawk.

Union Health Minister JP Nadda chuan GST siamthat chuan damlo enkawlna healthcare man a ti hniam dawn a, mipui nun a tihmasawn dawn tih a sawi. Vawiina Social Media-a a thu dahah Pu Nadda chuan sawrkarin mi rethei leh mi narante a ngaih pawimawh zia a lang leh ta a ti a. Mihring nun chhan nana hman thin damdawi chi 36 ah GST lak a ni tawh lo turte leh health leh life insurance ah chhiah tihtlem a ni chu a lawmawm atih thu a sawi a. Damdawi thenghat leh damdawi bungrua leh inenkawlna hmanraw thenkhata GST tihtlem chuan mitin tan damlo enkawlna man tlawm zawk a pe thei dawn a ni a ti bawk.

Puan tawh angina nimina GST Council thukhawm chuan GST a lakna thenkhat a tihnam a. He GST rate thar hi tun thla ni 22 atanga hman tan tur a ni. Union Finance Minister Nirmala Sitharaman chuan chanchinbumite hmaah GST lak dan thar chungchang sawiin mi naran leh middle class te nitin mamawh leinaah zaa 18 emaw zaa 12 emaw zaa 5 emawa tihhniam an rel a ti a.

GST tihhniam langsar zingah car te chi ho leh lirthei ke hnih nei 350cc chin ah GST zaa 28 lak thin chu zaa 18 a tihhniam a ni a. Bus, truck leh ambulance ah te zaa 28 atangin zaa 18 ah tihnam a ni bawk a. Auto part zawng zawngah zaa 18 lak a ni ang a. Three wheeler ah zaa 28 atangin zaa 18 ah tlakhniam a ni.

<><><>

PM

Prime Minister Narendra MODia chuan GST 2.0 chu ram hmasawnna leh sawrkar puihna kalkawp anih thu a sawi. Nimina National Teachers Award dawngtute nen an inkawmnaah he thu hi sawiin Pu Modia chuan a sawrkarin chhuanthar insiamthatna GST ah a thlen tih a sawi a. Mi naran middle class, mi rethei, thalai leh hmeichhiate tan GST siam that chu a hlawk hle dawn tih a sawi a. Hun inhre mil zela a insiam that loh chuan India chuan khawvelah dinhmun tha a luah thei lo ang tih a sawi.

<><><>